

# “LA PYNDEP”

DA

U IARINGTON KHARKONGNGOR

*“Ka ktien jong me ka long ka  
sharak ia ki kjat jong nga,  
bad ka jingshai ha ka  
lynti jong nga”*

## SHIKYNTIEN

Ha kane ka Kitab rit nga pyrshang. ban wallam kum ka jingianujor ia ki katto-katne kiei-kiei kiba iadei hapteng ka niam Khasi, bad ka niam Khristan. Kine ki niam baroh ar, haba shim kyllum ban pynshisha da ki sakhi jyngthoh, ki long ka niam kaba mane ia U Blei uba im. Namar kata, lah ban ong ba ki long kajuh ka niam—ujuh U Blei.

### I. KHARKONGNGOR

State Central Library  
Meghalaya, Shillong.

REFERENCE  
Not to be Lent out

## Ka Tien - Lamphrang

Nga sngewbha shibun eh haba nga la ioh ban pule lyngba ia kane ka kot "LA PYNDEP" ba la thoh da i Bah Iarington Kharkongngor ha shwa ba in phah shon ia ka. Ha kane ka kot, u nongthoh u pyni ia ka dur jong ka jingiajan kaba don hapteng ka 'Niam Khasi' bad ka 'Niam Khristan', kumba ka la poi sha kine ki lum jong ngi 128 snem mvnshwa. Ka jing'hoh hi baroh kawei ka pynpaw ia ka jingiakren hapteng u Missionary jong ka Balang Khristan bad u Nongkñia jong ka Niam Khasi kaba, kat kum u nongthoh, ka la jia ha ka snem 1872 ha Sohra, katba baroh ar ngut ki dang ialeit sha ki iing la ki jong ki para bangeit jong ki kiba don hapteng ka jingpang, ban leit duwai na ka bynta jong ki. Ha ka jingiakren, u Missionary u la pynpaw ba ka lynti sha u Blei ka long da ka snam, bad kumba U Jisu U la pynmih ia la ka snam na ka bynta jong ngi, ka lynti sha U Blei ka long tang da U hi. U pynpaw ruh ba ngi long baroh ki nong-pop hynrei U Jisu Khrist u la siewspah ia ngi na ki pop jong ngi baroh, da ka jingngeit ha U—kumba ka Bible hi ka ong ba 'khlem kaba pynm'h snam ym don jingmap ia ki pop'. U Nongkñia ruh, ha kawei pat ka liang, u mynjur ba ka lynti sha U Blei ka long da ka snam bad ba khlem kaba pynmih snam ym don jingmap ia ki pop, bad u ong ba 'u syiar u la pynmih ia la ka snam na ka bynta jong ngi bad kumta ka lynti sha U Blei ka long da u syiar.' Dei kata ruh ka daw balei ba la pyndonkam ia u syiar ha ki jingknia ainguh sha U Blei. U Missionary um pynrem ia kane hynrei u kdew shuh-shuh ba ka jingknia kaba da U Jisu Khrist ka iong tang shisien bad kata ka la biang na ka bynta ki por bad ki pateng baroh.

Library of the "Illumination of the Mind"  
It handles carefully with clean hands

Da kaba pule ia kane ka kot nga ngeit kiba bun kin da ioh shisha ka jingmyntoi ban tip shaphang ka rukom jingngeit jong ngi ki Knasi Khara kaba mynta ha kine ki sngi hi kiba bun (bad lajan baroh) kimi tip shuh. Ka niam Khristan ka la poi sha kine ki lum jong ngi la 128 snem haduh mynta bad ha kaba pdiang ia ka niam Khristan ngi la thap ban klet noh syndon ia ka jingngeit jong ki longshwa jong ngi. Hynrei ryngkat bad ka jingshai jong ka niam Khristan, ka long kaba dei eh ban tip ia ka jingngeit jong ki longshwa manshwa jong ngi.

Dt. Nongkrem,  
the 19<sup>th</sup>, February 1969.

H. M. Syiem.

## LA PYNDEP

Ka niam Khristan, katba ngi tip, ka ioh jaka ha kane ka ri-lum Khasi jong ngi tang naduh ka por ka jingwan ki Missionary. Ha shwa ka jingwan ki Missionary, u Khasi u don ka niam Khasi kaba kat da ka niam shisha. Ym kum u Khasi mynta ka hok bad ka sot ki iaid ha shwa ka jingim jong u ryngkat bad ka jingtip briew-tip Blei. U Blei, ha kawei pat ka liang, u kyrkhu kyrdoh ia ka longbriew manbriew, ka longiing longsem, ka longkur longjait, bad kumta terter. Ki briew ki dang sheptieng ia ka sang ka ma, ka thok ka shukor, ka bamsap, bad kiwei-kiwei kiba kum kita. Niar ch ban shem ka bishni, ka pihuiñ, ka iakajia majia baroh shikhrum ka bneng tang ka suk ka saiñ lem bad ka jingiaieit jan-pran uwei ia uwei pat naduh u kup-knup-u kup-trab haduh u pyngrem-u lyndan. Ka jingim jong ki, la ki long ha kano-kano ka dur ki suk: ki aiti ia lade ha U Blei, ki shaniah ha u ia kano-kano ka kam kaba ki trei. Namar ki dang tip ban tieng ia U Blei kumta U Blei um kynran noh na ki—u ai-nong lang tam ia ki: u pyndap tang da ka Jingai-isyn-ei, ka Jingieit, bad ki Jingkyrkhu de.

Haba ki briew ki ioh-diang ia ka jingieit bajanai tam U Blei, kim shlan ban shu sngap lhop khlem da pynpaw ia ka jingsngewnguh jong ki ia ka burom bakhraw jong u. Namar kata, haba ki pdiang ei-ei kaba ki sngewthuh

ba ka long na U Blei, ki kñia ai-nguh ha U Blei da kano-kano ka mrad (khamtam kaba tlem) kaba ki la pynkyntang na ka bynta kata ka kam. Borabor, haba ki ai ei-ei ne kñia ai-nguh ha U Blei, ki ju jied da kano-kano kaba kynsai tam, lada da ki mrad ne kino-kino ki jing-ai. U Blei, naba u iohi ia ka jingkylluid bad jingsbun mynsiem jong ki, u kyrkhu ym lah ñiew shuh. U ai ka met kaba koit ba khiah bha, ka spah ka hajar kyrhai, bad ka jingim kaba suk kynjai. Tang teng-teng, ki briew ki shah ha ka jingpynshitom u Ksuid ha uba aiti U Blei, na ka daw ka jingryngkang jong ki ia ki aiñ Blei. Hynrei la katta ruh, haba ki babe ia kaei kaba ki la kum leh, bad kumjuh haba ki pan map pat na U Blei, U Blei u ai ia ki ka jubab mar khmat lyngba ki jyngkñia jong ki. Ia kum kine ki jait jyngkñia la khot ka '*Niam*', ne ka '*Nia Im*' u Khasi, namar U Blei u ai jubab kaba shai kaba kat kum ka jingpan jong ki.

Ia ki jyngkñia, ym u paidbhur, hynrei don ki briew ia kiba khot '*Nongkhan*', ne '*Nongkñia*' kiba wat lada ym shym la pynsleh ia ki da kano-kano ka bor ba kynja pyrthei, phewse, ki don hi kata ka sap kaba la pynkup da ka bor bneng kaba kat ba kin nang ban pyndep ia kata ka kam na ka bynta u luk-u lak. U kup-knup - u kup-trab, ne u kup-shiliang sem-shiliang, ha kawei pat ka liang, haba ki sngewdonkam ia ki jyngkñia ki leit iakynduh ia u nongkñia ban pynleh lem na ka bynta jong ki. Haba ki nongphahkñia ki aiti ia ka kam ha u nongkñia, ki dei ban da siew

dor ia u ia ka bai pynkam, ka bai bam bai dih na ka bynta kata ka sngi, ka bai lut bai sep ha ka leit ka wan jong u, nalog kata, ki kohnguh de ban aiti ha u nongkñia ia u ne kata ka briew ba shah kñia ban kñia kat kum ka jingiadei ha kata ka jingpan jong u. (Mynshwa eh, u nongkñia um ju dawa jingsiew ei-ei). Nyngkong eh, u nongkñia haba u kñia na ka bynta jongno-jongno, la ha kano-kano ka dur, u da kylli shwa ia ka daw na u ne kata ka nongphahkñia, bad lada u sngew-iahap bad ka jingkam jong u, u pynleh, lynda kumta um ju kohnguh thala. Ha kaba khatduh eh, haba la biang ka jingiakren-iakhana, ka kular ka madar, bad kiwei-kiwei, u nongkñia, kat kum ka rukom jong u, u pyndep biang ia ki jyngkñia. (Shaphang ka jingiadei u nongkñia bad ki nongshahkñia, kumjuh, ia ka dak ka shin ha ki jyngkñia, yn iathuh ha kawei pat ka Kitab.)

Ha kawei ka sngi, ha ka 1872, katba u Sahep Missionary u dang iaaid lyngba ia kawei ka lynti khim ha Sohra u ia kynduh ngung ia uwei u Nongkñia. U Sahep u kren ia u hynrei u pat, imat, u la pynleit jyngmut than ha kata ka kam kñia jong u, um iohsngew bad um iohi ei-ei ruh ia u Sahep. Sa shisien pat, u Sahep u la kylli biang ia u ha ka sur kaba kham jam bad jlan: shano u leit. U Nongkñia u la kyn-dit thret kumba rah. U peit ia u bad u wiat muiñ. "Oh, i Sahep! shano phin leit?" la kylli u Nongkñia. "Nga mut ban leit jngoh ia iwei i briew iba shitom ha Mawmluh" la jubab u Sahep. "Phi pat phin leit shano?" la kylli u

Sahep. "Nga ruh nga mut ban leit sumar ia iwei i nongpang ha Mawsmat," la ong u Nongkñia. "Phi ong ba phin leit sumar, haba kumta, phi dei u nongsumar, mo seh? la kylli u Sahep. "Ngam dei phi, sahep. u nongsumar, hynrei nga leit tang ban iarap law ia ki jyngpang kiba don ha u nongpang," la jubab u Nongkñia. "Ha kano ka rukom phi lah ban law ia ki jyngpang haba phim long u nongsumar," la kylli biang u Sahep." "Wa, i Sahep, phim tip, mo seh, ia ka niam u Khasi! "Niuma, nga shu iohsngew," la jubab u Sahep. Hangta u Nongkñia u la sdang ban batai, "Ka niam u Khasi ka dei ka niam, nga rah ia une u 'lar-khad ha kti, uba tlem bha, ban kñia ha ka blei na ka bynta ka pap ka sang u khun-bynriew, bad dei lyngba na u keiñ ba nga lah pat ban iakren bad U Blei. (*Nga uba long ka lynti, bad ka jingshisha, bad ka jingim de: ym don uba wan ha U Kpa, hynrei tang da nga.* (Ioannis XIV:6). Ia ka jingshisha jong kane ka jingiathuh jong nga. phi lah ban sngewthuh na kane ka jingiathuh-khana harum:

Ha ka sngi kaba nyngkong eh, U Blei u la thaw ia ka bneng, bad ia ka Mei-Ram-Ew. Ka Mei Ram-ew ka kha san ngut ki khun, kita ki long: ka Sngi, u Bnai, ka Um, ka Lyer, bad ka Ding. Na kine san ngut shi para sa roi ki khlur ha sahit bneng, laiphew jait ki jynthung, bad ki mrad baroh ha sla khyndew. (*Da u la long kiei-kiei baroh; bad khlem ma u ym shyim la long kaei-kaei ruh kaba la long.* (Ioannis I:3).



Ha kata ka por, U Blei u iohi ha pyrthei ia kiei-kiei baroh tang da ka jingitynnat bad jingbha suda. Namar kata, u kyrkhu kyrdoh ia ka Mei Ram-ew ba kan nang roi irat. Ka Mei Ram-ew haba ka sngewthuh ba ki khun ki kti jong ka ki la sdang roi parum pareh, ka la kyrpad ia U Blei ba un buh sa u nongsynshar u ban shong halor jong ka. Te U Blei u la kohnguh, bad nangta, u la lum ia ka Dorbar Bneng ban iapyrkhat janai shaphang kata ka jingkyrpad ka Mei Ram-ew. U khot ia ki shakri bakhuid jong u baroh kiba don khat-hynriew bynriew. Kumta haba ki khat-hynriew bynriew ki la iapoi lang ha kata ka Dorbar Bneng, la mih ka jing-iatai-nia kaba jur. Khatduh eh, hadien ba ki la iatai nia, ki la rai da ka jingiamynjur lang ba na ki khat-hynriew bynriew kiba shong ha bneng, hynñiew bynriew (kata, ki hynñiew skum hynñiew trep) ki dei ban hiar noh sha pyrthei ban synshar halor jong ka. (Ka Sotti Juk, ne ka Juk u Sohpetbneng—Ka Juk jong ka hok.)

Haba ki hynñiew skum hynñiew trep ki la wan shong ha pyrthei, ka la long tang ka jingsuk bad jingbha suda; bad U Blei u la ai ha ki ia ka bor ban pyniaid bad synshar katba ki ibit. Shuh shuh, U Blei u thaw ka jingiateg-jutang kaba skhem ba katba u khun-bynriew un iaineh ha ka kam leh hok leh bha, ka jingiasoh na tbian ha jrong kan long kaba neh skhem; hynrei lada un leh ia ka pop ka sang, te ka jingiasoh na tbian ha jrong kan duh kan dam shisyndon. Ka sakhi jong kata ka jutang ka long kumne:

*“Ba kane ka diengbah kawei kaba la buh ban long ka jynskieng bneng yn khot ia ka ka Dieng-iei; na kane phin kiew sha bneng ban iawan ialeit, kumjuh kiba na bneng kin hiar ban iawan ialeit bad phi kiba shong ha pyrthei. Kane ka long ka jingiateh jutang ba lada phi iainei ha kane ka jutang phin long kiba iainei ha ka hok bad phin im junom ; hynrei lada phin pynduh ne khet noh ia kane ka Dieng-iei ka jingiasoh na tbian ha jrong kan duh kan dam, bad ka laiphew pop ka laiphew jynjar kan hap halor jong phi u hynriew, bad ka jutang ka la duh.”* (Na ka Riti jong Ka Ri Laiphew Syiem—na ka bynta kaba nyngkong—Da u G. Costa S. C.)

U khun-bynriew haba u iohi ba U Blei u dang iei ia ki katta-katta, nalar kata, namar u dang khmih ia ki, u la sngewnguh shibun eh ia u.

*(Bad u la phohsniew ruh, bad ha khmih ka jynskieng ba la thung ha khyndew, kaba ka khlieh jong ka ka da kot haduh bneng; bad ha khmih ki angel U Blei ki da iakiew bad iahiar ha ka.*

*Bad, ha khmih, U Trai u la ieng ha neng jong ka, bad u la ong. Nga long U Trai Uba U Blei u Abraham U Kpa jong me, bad U Blei u Isaak: kane ka khyndew ha kaba me thiah, ha me ngan ai duh ia ka ; bad ha u symbai jong me;*

*Bad u symbai jong me un long kum ka dewmet ka khyndew, bad men sa pait sa phriang noh sha sepngi, bad sha mihngi, bad shatei bad shathie: bad ha me yn long ba la kyrkhu ia ki jaitbynriew baroh ka pyrthei bad ha u symbai jong me.*

*Bad, ha khmih, ma nga nga don lem bad me, bad ngan ri bha iu me hangno-hangno ruh kat shaba me leit, bad ngan ialam biang ia me sha kane ka ri; naba ym iehnoh ia me, tat haduh ynda nga la lah pyndep ia kaba nga la ong ha me. (Genesis 28 : 12-15).*

Hamar ka por ba u khun-bynriew u dang shong suk-shong saiñ, dang lait na ka pap ka sang, ka pang ka shitom, ka thngan ka jying-it; la wan mih u lak-Jakor ha ka pyrthei. Haba une u iohi ba u khun-bynriew u suk u saiñ, u la sdang ban bishni bad pihuiñ; bad u la thaw lad da kumno ban pynkohnguh ia u briew ban pom noh ia kata ka Dieng-iei. Slem slem, hadien ba u la iai wad, u iakynduh ia ki briew arngut shipara - u Sormoh bad u Sorphin. Ha ka rukom kaba sianti, u la iateh lok bad ki. Bad haba u sngewthuh ba ka jingiateh lok jong ki ka la skhem bha, u la pyrshang ban pyni bun kiei-kiei kiba sniew da ka jingdon kata ka Dieng-iei. Kita ki 'riewradbah, haba ki sngap bad pynshongnia ia ka jingpyni u lak-Jakor, ki sngew ba ka long kaba dei. Bad khatduh eh, ki la mynjur ban pynkyllon noh ia ka Dieng-iei. U lak-Jakor haba u iohi ba, ki la kohnguh skhem, u leit noh bak sha la ka jaka shnong jong u hapoh duriaw. U Sormoh bad u Sorphin, ym slem hadien kata, ki la pyrshang ban thaw lad da kumno ban ioh wait bad sdie. Hadien ba ki la iai wad shitom, ki la ioh bad ki la shut ia ki ha ban da nep bha har. Ynda la dep, ki la pyrshang ban iawer ia ki lok ki jor, ki parakher-

paramer ban pom noh ia kata ka Dieng-iei, bad ki da pyni bun ki nia ba hikai u lak-Jakor. Ha ka juh ka rukom, haba ki lok ki sngap bha ia ka nia jong ki, ki la sngewiahap bad ki la mynjur ban pom pynkyllon noh ia kata ka dieng-iei. (.....uta u bseiñ tymmen, ia uba la khot u Ksuid, bad u Soitan, uba shukor ia ka pyrthei haroh kawei.....(Jingpynpaw 12:9).

Ha ka sngi nyngkong, ki la iapom baroh shi sngi; te ynda la miet ki la wan phai noh sha la ki iing. Lashai mynstep, haba ki leit ban pom biang ia ka, ki shem ba ka bynta kaba la lah pom ka la long biang kumjuh. Kita ki briew ki la lyngngoh bad ki la sngewduh jingkyrmen ruh. Hynrei jar la katta ki la sdang pom biang bad ki la neh haduh ban da sep sngi. Ha ka step kaba-ar, ki shem ba ka la long biang kumba mynshuwa. Ynda ha ka sien kaba lai, haba ki shem ba ka long hi kumjuh, ki la iapyrkhat ban lum noh da ka dorbar na ka bynta kata ka kam. Ha kata ka dorbar, katba u paid shityllup ka pyrthei ki dang iapyrkhat khuslai, la wan her ka phreit bad ka la shong ha tnat uta u Dieng-iei uba ieng ha kata ka jaka long Dorbar. Te ka la iathuh ha ka Dorbar ba u khla u byrngem ba ynda la kah dum ka Dieng-iei ia ka pyrthei un sa iaaid mon bad un jop ia u khun-bynriew baroh, nalar kata, katba u khun-bynriew u nang pom, un jliah, bad kata ka Dieng-iei kan nang iar bad nang khraw bun shah. Tang shu iohsngew lei-lei ia kane ka khubor, ka Dorbar ka la nang sheptieng shuh-shuh. Ha ka jing-

shisha, ka phreit kam shym kwah ban pynshep-tieng ne ban wallam ia ki kano-kano ka jingpynduh jingkyrmen hynrei ka kwah eh ban iarap ia u khun-bynriew ba kumno yn leh ban pynkyllon noh ia kata ka Dieng-iei.

U khun-bynriew, ha kawei pat ka liang, namar u la tieng eh ia u khla, u la kyrpad ia ka phreit ba kan sngewbha ban iarap lem ia ki ha kata ka kam. Ka phreit shwa ba kan ai buit ia ki, ka kwah ban pynlong ka jingiatch-soskular bad u khun-bynriew ha kata ka rukom ban teh ia u ba un bsa suk ia ka, nalar kata, un shah ba kan her mon halor ki lyngkha kba, krai, bad kiwei-kiwei kiba dei ki jong ki, pateng-la-pateng, khlem da pynshitom ne pyniap bein ia ka. U khun-bynriew, haba u iohi ba ka phreit ka long kaba rit shi-khunmaitnia. um sngewmong ei-ei lada ka ham; kumta u la mynjur da kaba suk mynsiem. Te ynda ki la iapynskhem ktien, ka phreit ka bthah ia ki ban pom ia ka dieng baroh shi sngi bad ha ka por miet kin pynthiah lyndang ia ka wait, u sdie, ha kata ka jaka ba la lah pom, kumta haba u khla un jliah bad un iakynduh bad ka syrti wait, te un mynsaw bad un nym nud shuh ban jliah sa shisien pat. Ha kata ka rukom, u khun-bynriew un sa lah ban pom pynkyllon ia ka Dieng-iei. U khun-bynriew u la sngew iahap bad ka jingbthah jong ka. Kumta, tang hpdeng katto-katne sngi, u khun-bynriew shityllup ka pyrthei u la lah pat ban pynkyllon ia ka. Tang shu kyllon ka Dieng-iei, ka pyrthei ka la shai kdar.(Ka Juk ka Dieng-iei—ka Juk

jong ka pap.) (*Naba kumta keiñ, kat kumba da uwei u briew ka pop ka la bsut sha ka pyrthei, bad da kata ka pop ka jingiap; bad kumta ka jingiap ka wan hap ha ki bynriew baroh phar, namar ba baroh ki la leh pop.* (Rom. 5:12).

Katto-katne sngi hadien kata katba u khun-bynriew u dang shah kyn-oi ha ki jingpynsngew-bha ka mariang, um shemphang satia shaphang ka lanot khop ka ban sa lap tang shibit shen. Ka por ka poi ba ki long kum ka *'lang-lyngngoh*, bad kata ka jia ynda haba ki la donkam ia ka jingialeit iawan sha bneng. Te, ki la babe ba ki la pynkyllon noh ia ka Dieng-iei. U paid shi-tyllup ka pyrthei u la sngewthuh ba u la hap ha ka pap ka sang namar u la pynkheñ noh ia ka jutang-Blei. U Blei u la sngewsih shi-katdei eh ia u khun-bynriew ba um bat ia ka jutang kaba la iateh bad u. Ka Mei Ram-ew ruh ka la sngewsih kthang na ka bynta ka pap u khun-bynriew bad ka la kwah ban iap noh. Kumta ka la khot ia la ki khun---ka Sngi, u Bnai, ka Lyer, ka Um, bad ka Ding. Bad ynda ki la iapoi lang baroh, ka la pynpaw ia ka jing-sngewsih kat haduh ba kam mon shuh ban im, bad kumta ka la iap noh artat. Ki khun, haba ki iohi ba ka kmie jong ki ka la iap noh, ki la khuslai. Ka Sngi, u Bnai, bad ki khlur kim shai shuh kumba ju long. Ka pyrthei ka la dum tliw, ka mariang ka la kynjah jar, bad u khun-bynriew u la poi ha ka dum ka lyngngoh. Um lah shuh ban trei ban ktah, ban ialeit iawan; u iakynduh tang ka jynjar, ka suhsat, bad ki jingeh suda.

U khun-bynriew u la khiih kulmar bad u la long kumba lamwir. (*Ngi baroh kum ki langbrot ngi la sakma; ngi la phai noh uwei-uwei sha la ka lynti; te U Trai u la huh halor jong u ia ka jingbymhok jong ngi baroh.* (Isaiah 53 : 6.)

Haba U Blei u iohi ba u khun-bynriew u la hap ha ka jynjar khop, u la isyn-ei. Kumta u la pynlong ka dorbar bneng ha kaba u khot lang ia ki jynghaw baroh kiba don ha pyrthei. Haba ki la iapoi lang baroh, U Blei u la kylli mano ba mon sngewbha hapdeng jong ki ban bah-ryndang ia u khun-bynriew na ka bynta ba u la leh ia ka pap ka sang, bad uei uba nud ban pha ia la ka jingim na ka bynta jong u. Shiphang, baroh ki shu iasngap jlang. Ynda kumba katto-katne por, la mih bluit u syiar napoh ka jaka shong jong u na sañium bah hapoh ka krem 'la-miet 'la-tang hapdeng ka 'law bah 'law san, uba long lymboit khlem jaiñ khlem nep bad ha ka dur kaba kiuh thot-thot, i kumba un kyllon; u la tyrwa sngewbha ia lade ha khmat U Blei Nongthaw ban shah ia la u ryndang tang ban im, ban bha, bad ban bit u khun-bynriew. Te haba U Blei u iohi ba u syiar u la ieng rangbah da kaba u ai la ka kular ban kit ban bah ia ka pap ka sang u bynriew baroh, u la pdiang sngewbha. U Blei, namar kata, u la ong ia u syiar ban leit iathuh sha u khun-bynriew ba lada u kohnguh ia ka kular jong u un wan rah pat ka khubor sha U Blei khnang ba un sa ai ka bor kaba biang ban thaw ka jutang kaba neh skhem. Haba u syiar u la kylli kaba kum kaei kata ka jutang

kaba un ai, U Blei u la iathuh ba ka jutang ka long ba u syiar un kyn-ih laisien lai wat, te ka pyrthei kan sa shai kdar.

Kumta u syiar u la mih na kata ka dorbar bneng ban wan sha u khun-bynriew. Dei ha ka por ba u khun-bynriew u dang shong pyrkhat shaphang kumno yn leh ban pan map na U Blei ia kaei kaba u la leh pop khnang ba un ioh pat ia ka jingshai, la wan mih bluit u Syiar hapdeng ka dorbar (ha kata ka por, ka dorbar ka dang khiih pisa ban shem ia ka lad ka lynti sha U Blei) bad u la tyrwa ia lade ha u khun-bynriew ba un leit ma u sha ka dorbar-blei ban iasaid na ka bynta jong u. U khun-bynriew, ha kawei pat ka liang, u la kylli ka dak ka shin a-iu un pyntip ia ki. U Syiar u la jubab ba un kit un bah-ryndang ma u ia ka lait ka let u bynriew baroh, un aiti ia la ka jingim ha khmat u Nongbuh Nongthaw bynriew ba un map ia ki bad ba ynda u la wan phai pat un pyntip ha ki ia ka jutang bad ki jingiakren baroh da kaba un kyn-ih laisien; bad hadien kata, ka pyrthei kan shai kdar kumba ju long. U khun-bynriew u la sngewbha bad u la kohnguh ba u syiar un leh kumba u la ong bad kular. (*U Trai u ingoh arsut na bneng ia ki khun-bynriew, ban khmih la don ne em manomano ruh ba la shemphang, ba la wad ia U Blei. Baroh ki la sakma noh : ki la kylla jakhlia lang noh; ym don shuh uba leh bha. em, ym don uwei ruh.* (Salm 14 : 2, 3.)

Nangta u Syiar u la mih bak ban leit sha



ka dorbar bneng. Tang shu poi, u syiar u la iathuh ha U Blei ba u khun-bynriew u la mynjur ia kaei kaba u la ong, bad najor kata, u la iateh kular bad u ba un wan sha U Trai Nongbuh Nongthaw. Haba U Blei u iohsngew ia ka kular ba u syiar un long nongkit bad nongbah ryndang ia u khun-bynriew, u la sngewbha, bad kumta U Blei u la pynkut ba dei tang ma u hi uba la ioh ia ka hukum bad uba la don ka kular. Ha kaba wai noh, ka dorbar ka pynskhem ba u syiar un kyn-ih lai sien lai wat, te ka pyrthei kan sa shai kdar. Ynda la wai ka dorbar, u syiar u la her arsut sha pyrthei, u da kyn-ih artat ter-ter lai sien. Hadien lai sien ba la kyn-ih u syiar, ka pyrthei ka la pher bad shai kdar. Dei namar kata ka daw, naduh kata ka por haba u khun-bynriew u shem kano-kano ka jingeh ne shitom u shim ia u syiar ban knia khnang ba u lah ban ioh ia ka daw tynrai jong kata ka jingjia. (*Kumba la thoh: ym don uba hok, em, ym don uwei ruh .....bad ia ka lynti ka jingpynsuk kim shym la ithuh; ym don ka jingsheptieng ia U Blei ha pyrshah ki khmat jong ki.....Namar baroh ki la leh pop, bad ki la duh lehnoh-ei ia ka burom jong U Blei.* (Rom. 3 : 10, 17, 18, 23.)

Namar kata, nga rah ia une u syiar ban knia khnang ban shem ia ka daw ka jingsngew-sih U Blei kat haduh ban da aiti ia uta u briew ha ka jingpynshitom jong u ksuid.

**Sahep**

Niuma, pleng ka niam jong phi  
kaba mane shisha ia U Ble uba-

im! haba kumta, phi khot kumno  
ia u Syiar?

**Nongkñia** Ngim ju tip phi, sahep, kumno ban  
khot; hynrei naduh kata ka por,  
ngi ju ong ia u u Nongbahkhala  
jong ngi u khun Khasi-Khara.

**Sahep** Phi ngeit ba ki nongpang kin koit  
na ki jyngpang jong ki tang kaba  
shu kñia da u syiar?

**Nongkñia** Kumba ki nongshahkñia ki ngeit  
kumta ki long.

**Sahep** Ka long da shisha kaba phi ong,  
hynrei ha kane ka juk mynta, naduh  
ba ka pop ka la jysieh klak ha  
pyrthei, U Blei um sngap shuh  
ia u briew, lynda u kylla bamut  
bad phla ia ki pop jong u.

**Nongkñia** Phi mut ba kita ki nongpang kin  
phla ha nga ia ki pop jong ki baroh?

**Sahep** Em-em-em, ki nongpang ki dei ban  
phla bad duwai ha U Jisu Khrist  
uba long U Khun U Blei uba-im,  
te kin ioh koit pat.

*(Namar uno-uno baroh u ban khot  
kyrpad ia ka kyrteng U Trai, yn  
pyn-im ia u. (Rom. 10:13.)*

*U Trai Jisu u la ong, uta te uba  
wan ha nga, da lei-lei ngan ym  
kyntait noh shabar. (Ioannis 6:37.)*

**Nongkñia**

Sahep, U Blei u don khun?

**Sahep**

Da shisha, U Jisu Khrist u long u Khun U Blei. La iathuh ha ki Jyngthoh Bakhuid ba U Jisu Khrist U long U Khun U Blei. (Ha ka Kospel u Ioannis, 3:16 *Naba U Blei u la ieit katta-katta ia ka pyrtnei katba u la aiti noh ia la u Khun ba la kha marwei, ba uei-uei ruh uba ngeit ha u, un ym jot shuh, hynrei un ioh ia ka jingim bymjukut.*) Ym tang katta, na ki saw tylli ki kitab rit ia kiba ngi khot 'Kospel', bad kumjuh na ka Baible hi baroh kawei, lah ban ioh ia ka tynrai jingtip shaphang ka jingim bad jingwan long briew U Jisu Khrist. Kane ka long ba U Jisu Khrist u long U Khun U Blei. Lada yn thoh lut baroh ia kaei kaba u leh bad kren, ka pyrtnei kan ym ngiam. Hynrei la thoh ia ka Baible ban long ka sakhi bad ban pynshisha ia ka jingim jong u (*Hynrei la thoh ia kine kiei-kiei ruh ba phin ioh ngeit ba U Jisu u long uta U Khrist, U Khun U Blei; bad ba haba da ngeit, phin ioh ka jingim ha ka kyrting jong u.* (Ioannis XX:31.)

**Nongkñia**

Wat iathuh phi, sahep, ia kata ngam kwah tip.

- Sahep** Wa, I Bah! phim kwah ia ka jingpyn-im da U Jisu Khrist?  
*(Kane ka ktien kaba shisha, bad kaba bit ia ka ban pdiang haroh phar, ba U Jisu Khrist u la wan sha ka pyrthei ia ka ban pyn-im ia kiba pop.....(1 Timothi 1:15.)*
- Nongkñia** Ia ka jingpyn-im ngi lah hi ban ioh na U Blei jong ngi lyngba ki jyngkñia.
- Sahep** Ho-oid, ka long kaba shisha kaba phi ong, hynrei, kaba kñia da u syiar ka iadei eh bad ka jingim u longshwa mynshwa ne ha ka por kita ki hynñiew trep hynñiew skum hyndai kumba phi la iathuh.
- Nongkñia** Te kumno ngi dang lah ban shem ia ka dak ka shin haba kñia?
- Sahep** Phi lah ban shem, ym pher, phewse, ka jingshem jong phi ka long kaba mat-lah. Phin ym lah ban pynshisha da lei-lei, nador kata, ka dak kaba pynpaw ha ki jyngkñia kumba phi la ong, ki la long mat-lah lut ha kane ka juk mynta, namar u khun-byñriew nador ba u la leh pop, u la ngam sa ha ka sang de. Kumta U Blei um pynpaw shuh ia ka dak ha ki jyngkñia, bad ia ka bor ha u nong-

kñia la dkhat lut baroh. Nga nud ban ong kumta ha khmat jong phi namar ha ka juh ka dur kumba phi la iathuh ia nga shaphang ka jingpynlong U Blei ia ka pyrthei, kat kum ka jingngeit Khasi, nga ruh ngan iathuh ha phi mynta ia ka jingshisha shaphang ka jingpynlong U Blei ia ka pyrthei katba lah ban shem na ki Jyngthoh Bakhuid kaba la thoh da ki briew kiba la pyrsad mynsiem da U Blei hi. Ia kane ka jyngiathuh-khana, lah ban shem ha ka Kitab, ka 'Jenesis'.

Ha kaba nyingkong eh, U Blei u la thaw ia ka bneng, bad ka khyndew (Mei Ram-ew). Nangta, ia ka *jingshai* kaba khot ka *Sngi* (U pyniakhlad ia kata ka *jingshai* na kata ka *jingdum* kaba khot ka *Miet*), ia ka *Um*, bad u la ong ruh: *To long ba ka khyndew kan pynmih speh, ba ki jhur kin pynsei symbai, bad ba ki dieng soh kin sei ha la ka jait ka jait, kiba don la u symbai hapoh jong ki, halor ka khyndew. Ka la long kumta keiñ.*

Bad ym tang katta, U Blei u la thaw ia ki *Khlur* ban pynshai ia ka pyrthei ha ka por miet; shuh-shuh, ia ki kynja ba-im ba par baroh hapoh um bad khyndew, bad nalor nangta, u la kyrkhu kyrdoh ia ki, u da ong: *To da nangkha, bad to da nangroi, bad to pyndap ruh ia kita ki um ha ki duriaw, bad to ai ba kiei-kiei ruh ki kynja baher kin ia nangroi ha ka khyndew.* Bad khatduh eh,

U Blei u la ong ruh ha u Khun jong u, U Jisu Khrist; *To ngin iathaw ia u brieve ha ka dur jong ngi, katba kum ka jingsyriem jong ngi hi; bad kin synshar halor ki dohkha ka duriaw, bad halor ki sim bneng, bad halor ka pyrthei baroh, bad halor kiei-kiei ki kynja ba par baroh kiha par halor khyndew.*

Kumta U Blei u la thaw ia u brieve ha ka dur jong u hi, ha ka dur U Blei keiñ u la thaw ia u; shynrang bad kynthai, u la thaw ia ki. U Blei u la kyrkhu ruh ia ki. Hadien kata, U Blei u la iohi ia kiei-kiei baroh ba u la thaw, ha khmih ruh, ka la bha eh. Dei haduh ka sngi kaba hynrieve ba U Blei u la pyndep lut ia la ka kam ia kaba u la lah pynlong; bad ha kaba hynrieve ka sngi, u la shong sngi na ka kam jong u baroh kaba u la pynlong, bad u la kyrkhu bad kyntang khuid ia ka.

U Blei u la thaw ia u brieve na ka dewmet ka khyndew, bad u la pyrsad ha ki thlieu khmut jong u ia ka jingpyrsad ka jingim; bad uta u brieve u la long ka mynsiem ba im.

U Trai uba U Blei ruh u la thung ia ka kper ha ka Eden (lum Dieng-iei) shaphang mihngi; bad u la buh hangta ia uta u brieve uba la lah thaw. Bad U Trai uba U Blei u la pynlong ba kin mih na kata ka khyndew ki dieng kiba bit eh ia ka ban bam; bad hapdeng kata ka kper ia u dieng ka jingim (dieng-iei), bad ia u dieng ka jingtip ia kaba bha bad kaba sniew. Ka

wah ruh ka la mih noh na Eden ia ka ban ai um ia kata ka kper. U Trai ba U Blei u la shim ia uta u briew, bad u la buh ia u ha ka kper ia ka ban trei bad ban sumar ia ka. Bad U Trai uba U Blei u la hukum ia uta u briew u da ong: (ka jingiateh jutang hapteng U Blei bad u briew) *Na u dieng baroh ha ka kper, da kaba bam me lah ban bam ei: hynrei na u dieng ka jingtip ia kaba bha bad ia kaba sniew, men ym ioh bam na u; naba ha kata ka sngi ha men bam na u, da kaba iap men iap shisha.*

Ha kata ka por, U Blei u la thaw ia u Adam tang marwei ha khyndew. (Imat, kumba katto-katne hajar snem mynshwa, u la shong khlem nongsumar.) Ban im khlem nongsumar, U Blei u i ba ka long ka bym ibit eh ia u. Kumta u la ong: *Ngan thaw ia u ka nongsunmar lem kaba biang.* Te U Trai uba U Blei u la pynngat ha u Adam da ka jingsamthiah kaba jur, u ruh u la iohthiah : bad u la shim ia kawei na ki shyieng-krung jong u, bad na kata ka shyieng-krung ia kaba u la lah shim na uta u briew u la pynlong ka briew bad u la wallam ia ka ha uta u briew. Ia kata ka briew, namar kata, u Adam u shim ba ka long ka tnga jong u.

Ha kata ka kper Eden, u Adam bad ka tnga jong u, ka Im, ki ia im suk im saiñ kum ha ka por jong u Sormoh bad Sorphin. Ym ju don ka thngan ka jyng-it, ka shitom ka shijot, ki jyngpang laiphewjait, ne kino-kino kiba long ka jingpynsngewsih ia ka mynsiem jong ki.

Te katba ki dang im hapdeng ka suk ka saiñ, ha khmih, uta u bseiñ (Iak-Jakor) u la long uba kham sian ïa ki mrad baroh, u wan ha kata ka briew bad u la pynshoi da kaba ong: *Shisha ka long kumta, ba U Blei u la ong, phin ym ïoh bam na u dieng baroh ha ka kper?* Bad kata ka briew ka la ong ha uta u bseiñ, na u soh ki dieng ha ka kper, ngi ïoh ban bam. Hynrei na u soh jong uta u dieng uba hapdeng ka kper, U Blei u la ong: *phin ym ïoh bam na u, lymne ktah ïa u, ba ïoh phin ïap noh.* Te uta u bseiñ u la ong ha kata ka briew, *phin ym ïap noh shisha.* Namar U Blei u tip ba ha kata ka sngi ba phin bam na u, un sa pynpeit ïa ki khmat jong phi, bad phin long kum ki blei, kiba tip ïa kaba bha bad kaba sniew. Te haba kata ka briew ka la ïohi ba uta u dieng u la long uba bha ban bam bad uba itynnat ïa ki khmat bad u dieng uba bit ïa ka ban pynstad, ka la shim na u soh jong u bad ka la bam ruh, bad ka la ai de ha la u tnga; u ruh u la bam. Hadien kata, la pynpeit ïa ki khmat (la shai ka pyrthei kdar kum ha ka por u Sormoh bad Sorphin) jong ki baroh ar ngut, bad ki la tip ba ki la long kiba lyngkhuid.

U Trai uba U Blei u la sngewsih eh haba u ïohi ba u Adam bad ka Im ki la ryngkang ïa ka hukum jong u, u khot ïa u Adam bad kumjuh ïa ka Im, bad haba u kylli ïa ki, u shem ba dei u bseiñ uba hikai kum kata kaei-kaei kaba sniew. Namar kata, U Blei u la tim nyngkong eh ïa u bseiñ, nangta u ong ha kata ka briew,



*da kaba pynroi ngan pynroi ia ki jyngpang jong pha, bad ia ki jingseng khun jong pha; ha ka jingshitom phan kha ki khun.....bad khatduh eh, U Blei u la ong ha u Adam, Namar ba me la shah shkor ia ka ktien jong ka tnga jong me, da kaba ong men ym bam na u: ia ka khyndew la tim na ka bynta jong me; da ka jingshitom men bam na ka baroh ki sngi ka ryta jong me..... da ka jingsyep ka khmat jong me men bam ia la u kpu, haduh ban da phai dien pat sha ka khyndew; namar na ka la shim ia me: naba ka dewmet me long, bad sha ka dewmet men leit phai pat.*

Na ka jingshisha ba la pyni haneng, ka paw shai kdar ba U Blei u la sngewsih shi-katdei ia ki briew namar ka jingpalat hukum jong ki. Naduh kata ka por, ka hok U Blei ka la leit noh bad kaba sah ka long sa tang ka mon u briew. Ki briew ki la phai noh na U Blei bad ki la sdang iaaid ha la ka jong ka mon. Namar kata, ki jyngpang laiphewjait ki la nang-kha roi; ka pop bad ka sang ki la nang shlei, bad shi-tyllup ka pyrtnei ki shem sa tang ka bym biang bad ka bym suk suda.

Te katba ki sngi ki nangiaid, ki jingsniew ki la nang shlei bad ka poi ka por ba U Blei u hap ban pyniap lut ia ki baroh (lait noh u Noah, bad ki khun ki kti jong u) da ka jingpynshlei um kaba khraw. (*Da ka jingngeit u Noah, haba la maham ia u da U Blei shaphang kita kiei-kiei ia ki bym pat shym la iohi, haba la pynkhih ia u da ka jingtieng 'riewblei, u la thaw ka iing-lieng*

*ban pyn-im ia ka iing jong u: da kaba u la pynrem ia ka pyrthei, bad u la jia-long u nongiohpateng ia kata ka hok kaba katba kum ka jingngeit.* (Hebru XI:7.) Hadien, haba la pynngop lut ia ki jingsniew baroh, ka pyrthei shipor ka i kumba ka la bha pat. Hynrei slem-slem, haba ki khun ki kti u Noah ki la roi parum-pareh, ki jingsniew ki la kharoi biang. Haba ki briew ki la nangsang bad nangroi ha ka pop kumba mynshwa, U Blei u la khuslai sat bad u la babe ba u la thaw ia u briew. Ha kata ka por, um mon shuh ban pynjot ia ki jynghaw jong u kumba mynshwa, namar u iohi hapdeng jong ki don kiba hok shisha bad kiba dang tieng ia U Blei. U Blei, naba u ieit eh ia kiba hok bad kiba kohnguh ia ka hukum jong u, u la kyrkhu kyrdoh, pynroi ka longiing-longsem, ka longspah longhajar jong ki. U kwah eh ban pynjan ia ki sha lade, hynrei namar shisien ba u briew u la leh pop, um mon shuh ban pynpaw ia lade ha ki. Khnang ba kiba leh ia ka mon jong u kin sngewthuh ba u don ryngkat bad ki, u pyni noh ia ki da kawei pat ka lad ban iakyn-duh bad u, bad kata ka long, da ki jyngekñia. U hikai ia ki kumno ban kñia bad ban pyndep ia ka niam ka rukom kaba iadei bad U Blei. Da kane ka lad, kiba ieit ia u ki tip biang-biang ba U Blei u jan ne jngai na ki.

Ha kata ka por, U Blei u pdiang ia kino-kino ki jyngekñia, lada da ki jynthung lane da ki mrad laiphewjait, haba ki kñia ai-nguh na ka bynta ban kyntiew ia ka kyrteng bad burom jong u,

ne namar kano-kano ka daw babha. Ki jyngkñia jong ki ki don da ka dur, ka jyngmut, ka rukom, bad ka niam. Haba ki kñia, U Blei u jubab thik-thik ia kaba bha ne kaba sniew. U pynpaw shynna ia ka jingbiang ne jingbymbiang ka jingpan jong ki. Ki jyngkñia ki dei ban long kiba janai bad bym don jingbit tngit. Ki briew jong U Blei, namar kata, ki don ka jingkyrmen ia la ka jingim haba ki tip ba U Blei u don ryngkat bad ki. *(Da ka jingngeit u Abel u la ai-nguh ha U Blei ia ka jyngkñia ba kham kor ban ia u Kaiñ, da kaba la phla ia u ba u long uba hok, U Blei u da phla habha shaphang kita ki jingai jong u; bad da ka, haba u la iap u dang kren. (Hebru XI:3).*

Ka long kaba sngewsih wat haba U Blei u la pynpaw katno-katno sien ia ka jingieit jong u, phewse, kata kam long hi satia kaba kordor ha khmat u birew. Katba nangiaid ki sngi bad ki por katta ki briew, ha ka jynlong runar jong ki, ki pyrshang ban ialam bad pyndonkam bakla wat ia ki jyngkñia hi. Kim ai jyngkñia shuh kat kum ka rukom. Namar ka jingieit bad jingkohnguh Blei jong ki ka la shong sting, haba ki kñia ha U Blei, kim pynbiang bad pyndep kat kumba dei biang. Ki jingsniew bad ka pap ka sang jong ki briew suki-pa-suki ka rung wat haduh ki jyngkñia. Ki jyngkñia jong ki kim long khuid shuh kumba mynshwa. Na kata ka daw, U Blei u lyndet noh na ki, bad ha ka jaka jong u, la wan shong pli pat da u ksuid.

Sa shisien pat, naba U Blei u kwah ban pyn-im ia ki nongpop baroh, u phah noh da ki Nongiathuhlypa ki ban iathuh lypa ia ki jingjia bad ia ki dak shaphang kaba bha bad kaba sniew ha ki sngi ki ban sa wan. Don napdeng ki Nongiathuhlypa, kum u Jeremaiah, u Isaiah, bad kiwei-kiwei, kiba ia-thuhlypa wat ia ka jingkut jyngmut U Blei ban phah ia la u khun ba la kha marwei sha kane ka pyrthei ban shah iap ia lade halor ka Diengphna namar ki pop jong ngi. (*“Uei une uba wan na Edom, bad ki jaiñ ha la ai rong na Bosra? Une uba phyrnai ha ka jaiñ jong u, u da iaid phieng ha ka jingkhraw ka hor jong u? Nga uba kren ha ka hok, uba donbor ban pynim.*

*Balei ha saw la ka jaiñ, bad ha ki jaiñkup jong me ki long kum uba ioh ia ka kor tylliat waiñ? (Isaiah LXIII : 1, 2.) Dei naduh ka jingwan U Jisu Khrist sha kane ka pyrthei ba la pynim pat ia ngi na ki pop jong ngi baroh.*

*(Ha kane la pynpaw shynna ia ka jingieit U Blei ha ngi, ha U Blei u la phah ia la u Khun ba la kha marwei sha kane ka pyrthei, ba ngin ioh im da u. Ha kane ka long ka jingieit, ym naba la ieit ma ngi ia U Blei, hynrei naba u la ieit ma u ia ngi, bad u la phah ia la U Khun ban long ka kuna na ka bynta ki pop jong ngi.)*  
(I Ioannis 4:9-10).

**Nongkñia** Haba sngap ia ka jingĩathuh jong phi nga sngew kumba ym don

jingīapher ei-ei ha ka rukom thaw  
 U Blei ia ka pyrthei Khasi jong  
 ngi, bad ka pyrthei Khristan jong  
 phi.

**Sahep**

Ho-oid bah, ka long kaba shisha  
 kata kaba phi ong, hynrei don  
 tang kawei kaba iapher, bad kata  
 ka long, nga ju pynshisha da  
 ka sakhi kaba biang ia kaei kaba  
 nga iathuh katba phi pat phi shu  
 antad madei; nalar kata, phi pyn-  
 ksan jubor ia ka jingngeit khlem  
 nongrim jong phi. U Jisu Khrist,  
 U Khun U Blei uba im, dei tang  
 ma u hi u nongbahkhala ia ka  
 pop ki briew baroh. Naba uei-uei  
 uba ngeit ha u un ym jot shuh  
 hynrei un ioh ka jingim bym-ju-kut.

**Nongkñia**

Da lei-lei ruh ngan nym pdiang ia  
 U Jisu Khrist jong phi kum u Khun  
 U Blei bad u Nongpyn-im jong ngi.  
 Nga ngeit bad kohnguh tang ha uta  
 uba nga ju ksan da ka nia ka  
 jutang lyngba ki jyngkñia jong nga.

**Sahep**

Nga la iathuh ha phi ba ha ki sngi  
 shwa ka jingwan longbriew U Khrist,  
 baroh ki jyngkñia ba-im la pynksan  
 da U Blei; hynrei mynta, ia ki  
 jyngkñia baroh la pyndep ha U  
 Khrist. U long u Jyngkñia ba-im

—la pyn-im ïa ki pop jong ngi baroh da u. Ka Ktien U Trai ka ong, *La pyndep* (Ioannis XIX:30) (*Da kata ka mon la pynkhuid ïa ngi da kata kaba ai-nguh ïa ka met U Jisu Khrist tang shisien ai. Hynrei une , haba u la ai-nguh tang kawei ka jyngkñia namar ki pop junom, u la shong ha ka kti kamou U Blei.* (Hebru X:10, 12).

**Nongkñia** Phi tharai ngam lah ban pynkoit ïa u nongpang da ki jyngkñia jong nga?

**Sahep** Kat kum ka kular U Trai jong ngi, da shisha phim lah. (*Namar nga mon ïa ka jingisyn-ei, te ym ïa ka jyngkñia; bad ka jingtip ïa U Blei ban ïa ka jingai-nguh thung.* (Hosia VI:6). *Hynrei khie leit ma phi to hikai kaei kane. Ia ka jingisyn-ei nga mon, te ym ïa ka jyngkñia: naba ngam shym la wan ban khot ïa kiba hok, hynrei ïa kiba pop ïa ka ban kylla kaba mut.* (Math. IX:13). U Trai da ka snam jong u la siewspah lut ïa ki pop jong ngi baroh: (*Mynta ha U Khrist Jisu, ïa phi kiba la ju long jngai mynno-mynno, la pynlong hajan ha ka snam U Khrist* (Ephesos 2:13). *Naba U*

*Kpa u la sngewbha eh ba ka jing-dap baroh kan shong tylli ha u: bad da u ban pyniasuk noh ia kiei-kiei baroh ha lade hi, haba la lah pynlong ia ka jingpyniasuk da ka snam ka diengphna jong u. (Kolossai 1:19, 20). Lada uei-uei ruh u don ha U Khrist, u long u jynghaw bathymmai; kiei-kiei ruh kiba rim ki la duh noh, ha khmih, kiei-kiei baroh ki la jia-long thymmai. (2 Korinth 5:17).*

### Nongkñia

Sahep, ba phin da pynksan eh kumta ia lade, to alle ngin iapyni bor mynta hapdeng u Syiar jong nga, bad U Jisu Khrist jong phi.

### Sahep

U Jisu Khrist um long uba khwan bor; u bym kwah burom; uba isyn-ei ia kiba shitom bad jynjar sat--u im ha kane ka pyrthei 33 snem ym ban iapyni bor badno-badno. U donkam ia ki nongpang ban pynkoit ia ki, u long u lok jong kiba shem jynjar, u kwah ruh ban hikai ia ki briew ia ka jingim babha, bad don ruh kiba u pyn-im wat ia kiba la iap hi. (*ki paidbah babun te ki la wan ha u, ki don lem bad ki, kiba dkoh, kiba matlah, ki bym nangkren, kiba kynriang, bad shibun kiwei-kiwei ruh; bad ki la*

*buh ïa ki hajan ki kjat U Jisu, te u la pynkhiah ïa ki. (Math. 15:30).*

### **Nongkñia**

Phi i, sahep, u Khasi um ju long uba ngeit biej lynda pynbiej ïa u da ka jingiohi ïa ka sakhi ba ka long kaba shisha.

### **Sahep**

Oh em, kam long kumta. U Trai Jisu u long U Khun U Blei. U kwah ïa ngi ban pyn-im ei da u. *(To wan ha nga phi baroh kiba thait bad ha khia ka jyngkit, te ngan pynjem ïa phi. (Math. 11:28).* Dei na ka jingshisha jong katei ka ktien bad na ki jingkular bym-ju-kylla jong u, ba ma nga ruh uba long shisien u nongïapyrshah Jisu nga pdiang ïa u mynta kum U Nongpyn-im ei jong nga. Shipor, nga la ïeng ban ïaleh pyrshah ïa ki Nong-ïalap U Jisu Khrist, hynrei namar ka jingieit jong u U Mynsiem U Trai u la trei jur hapoh ka dohnud jong nga, bad ha kaba khatduh, haba nga la pdiang ïa U Jisu Khrist, ka dohnud jong nga ka la suk jai—ka jingsuk kaba ym don jingsuk ha pyrthei kaba bit ban ïanujor—ka jingsuk jong ka bneng hi. *(Ia ka jingsuk nga iehnoh ha phi, ïa ka jingsuk jong nga, nga ai ha phi, ym kumba kata ka pyrthei*



*ka ai, nga ai ma nga ha phi. Wat khiih khuslai na ka dohnud jong phi lymme wat sheptieng. (Ioannis XIV: 27).*

**Nongkñia** Sahep, da shisha, ki briew baroh ki kwah ia ka jingsuk. Nga ruh, kum u nongsumar ki nongpang, nga kwah ban pyngoit ia ki te ba kin ioh suk.

**Sahep** Wa, ine i bah, imat phim sngewthuh, mu seh? U Jisu Khrist u long u nongsumar ym tang ia ka doh, u sumar khamtam eh ia ka mynsiem.

**Nongkñia** Ew? kata ka bym lah long: uei uba lah ban sumar ia ka mynsiem, sa tang U Blei hi keiñ uba lah ban leh ia kata.

**Sahep** U Jisu Khrist U Khun U Blei, u lah ban leh ia kata.

**Nongkñia** To ong bad to kren katba phi sngew-bit, nga te ia lade ngam ngeit da lei-lei ruh katba dang ksan ka nia ka jutang jong nga. Nga ngeit bad shaniah ha U Blei uba im bad lada ma u hi u dawa ia nga ba ngan phai noh na kane ka lynti kaba nga ju iaid, ia kata te ngan leh.

**Sahep**

Long ka Mon U Blei ha phi kumba ha nga. (*Nga nga long u Nong-aplangbrot uba bha; uta u nongaplangbrot uba bha u aiti noh ia la ka jingim na ka bynta ki langbrot..... Nga don kiwei pat ki langbrot ruh ki bym long na kane ka jingker; ia kita ruh ka dei ia nga ban wallam, bad ki sngap ia ka ktien jong nga; te kin ialong shikynhun, bad uwei u nongaplangbrot.* (Ioannis 10:11, 16).

Ka por ka la iaïd stet, bad kumta ki la iaïpra noh sha la ka jong ka jong ka lynti. Ynda u Nongkñia u la iaïd kumba katto-katne por, bad katba u dang puson bha ia ka jingiäkren jong u bad u Sahep, ha khmih, ka jingkren kaba ong, "*Naba U Blei u la ieit katta katta ia..... ba uei-uei ruh uba ngeit ha u, um ym jot shuh, hynrei un ioh ka jingim bym-ju-kut*" ka la wan shoh biang ha ka jynghmut jong u. Te katba u dang pyrkhat jylliew bha shaphang kata kaei-kaei, kumno-re-kumno kum ha ki jingphohsniew u la iohi biang ia u Sahep ba u thaiñ khop ia uta u nongpang ia uba u mut ban leit sumar. U Sahep u pyn iha u ba u nongpang u la koit pat na kata ka jynghpang. U Nongkñia u la lyngngoh ban iohi ba u nongpang u iaïeng bad u Sahep ha ka jynlong kaba u la koit bha. Ym slem hadien kata, shi kynhun ki briew kiba iaïd lynti nangta, ki la iohi ia uta u Nongkñia ba u ieng lyngngoh hangta marwei. Ki kren ia u

bad u pat um iohsngew ei-ei ruh em ia ka sur jong ki. Te haba ki la iai ban ktien, u la kyndit thret kumba rah. Ha ka jaka ba un kren ia ki, u peit biang sa shisien pat ia u Sahep; u phai shane dad shawei kumba u iohi ei-ei . Kata lei-lei ka jingleh jong u, ka la nang kham pyn-lyngngoh shuh-shuh ia ki. Ki la pyrkhath, lehse, uta u nongpang u ioh kem pang ha kata ka jaka. Ynda haba u Nongkñia u la kyndit byn-riew pat, u la sdang ban kren ia ki. Kita ki briew kiba ia ap hangta ki la kylli na u ia ka daw. U Nongkñia u la iathuh ia ki ba um sngewshait bha ka met. Te namar ba ki la i suba ei-ei na ka jingleh bie jong u, kim lah shah ba un shu len kumta. Uwei na ki, naba u pyrkhath ba u Nongkñia u ioh jyngpang, u thain khop bad u ong ba un ialeit lang noh bad u. U Nongkñia u phai ktien ba um don jyngmut ei-ei ban leit phai noh sha la iing naba u don uta u nongpang ia uba u mut ban leit sumar. Te hadien ba ki la sngewthuh ba don kaei-re-kaei kaba la shoh pyn-tyllep kumta, kim kwah shuh ban pyndik ia u. Ki tyrwa ia lade ban leit iasynran lem ia u haduh kata ka jaka kaba u leit sumar nongpang. U Nongkñia u la sngewnguh ia ki. Ynda ki la iaiaid shi jam ar jam, u Nongkñia u la kwah eh ban iathuh ha ki ia kaei kaba jia ha lynti.

U pynpaw ha ki ba u iohi ha kata ka lynti iaid jong u ia uta u Sahep uba phong jain lieh bad ba u riam ha ka khmat jong u da ka sniehdoh kaba imat lyngba ia ka jabieng bad wat ia ka doh jong u hi. Ym kum u sahep, u ong, um ju iohi mynno-mynno ruh uba kum uta. Kita

ki briew katba ki dang sngap bha dngong ia ka jingiathuh jong u, ki la pyrkhat, lehse, u Nongkñia u lah ban iashem bad U Blei. Haba ki pyrkhat bha, ki sngew ba kata kam lah ban long namar shisien ba u briew u la leh pop, la eh ba un dang iakynduh pat bad U Blei markhmat. Hynrei kaba u briew u lah ban ithuh bad iashem bad U Blei ka long tang lyngba ka dak ba paw ha ki jyngkñia. Ki briew ki la dum ka buit ka stad bad kim nang pyrkhat shuh da kumwei pat. Khnang ban pynhun ia u, ki ong ba kata kaei-kaei ka ju jia teng-teng haba uno-uno u briew um sngewshait bha ka met. U Nongkñia u ong ba um sngewhun satia ia kata ka jingkren kyndam jong ki. Hynrei la katta ruh u sngewtynnat ia ki namar ki iapynshngaiñ lem ia u. Marte-marte, katba ki dang iashit bha ha kata ka jingiakren, ki la iohi ia u briew sha shiliang lum (kumba shi pda khnam ei-ei na ka jaka kaba ki don) uba mareh sia-sia ban wan tan ia u Nongkñia. U tang shu iakynduh bad ki, u kpa jong uta u khynnah uba pang u la iathuh ba u khun jong u u don ha tmier ka jingiap. Kiba ha iing hasem jong u, u iathuh, ki iashong tawiar miet bad sngi halor ka jyngthiah u khun, ban ap sa tang ia ka mynsiem. U Nongkñia u la kylli ia u la u la pynbiang ia ki jingdonkam baroh kiba iadei bad ki jyngkñia. U kpa u jubab ba u la lah pynkhreh lypa ia ki naduh shwa ban wan khot ia u.

Tang shu poi ha kata ka iing, u Nongkñia u la rung beit sha ka kamra ba thiah uta u nong-

pang. Haba u iohi ba u nongpang u la shitom jur, u ong ia ki trai-iing ban pyinkhreh kloi-kloi katto-katne ki pylleng syiar, uwei u 'iar-ryngkuh uba tlem bha, bad katto-katne ki jingdonkam kiba iadei na ka bynta ki jyngkñia. Nangta u kylli na ki kmie ki kpa ia ka daw jong kata ka jyngpang. Ki kmie ki kpa, ha kawei pat ka liang, ki iathuh thik kumba u long. Ynda ki la dep iakren, ki la mynjur ban aiti ha u Nongkñia ia uta u nongpang ban law iaki jyngpang kiba don ha uta u khynnah. U Nongkñia lem bad ki kmie ki kpa, ki kñii uta u nongpang, ki la iamih na iing ban leit sha ka jaka wah ban pynlong jyngkñia hangta. Mar shu ia poi, u la sei ia ki jingdonkam baroh ha madan, bad tang hapdeng kumba katto-katne por, u la lah pynbeit ia ki jingdonkam baroh kiba iadei bad ki rukom jyngkñia jong u.

Borabor, ki ju iasong kwai shwa ban sdang ia ki jyngkñia. Hadien kata, u Nongkñia u la kyn-ud sur kñia bad u da tim-kñia ha ban da suwan hi khoit. U kyrpad kyrpon ha ka blei ban pyni shai da ka dak ka shin (ka jingkem, lane jinglar) ia ka daw jong kata ka jyngpang. Ynda u la lap daw, u duwai, u shan ia ka nia ka jutang khnang ban ai noh ka khiah ka nang bad ba kin sa kynmaw katba shong ka nguh ka dem u klong u skaw..... Haba u briew um koit satia, u dei ban da kylli sa kylli bniah bha, ioh don naei ba dang duna ne kum palat ia ka nia haduh ban da lap. Haba u sngow ba la biang ka jingpan jong u, u ieng tuiñ ban lympat ia ka pylleng ha ka dieng-shat. (Ym don jaka hangne ban batai bniah ia ka

rukom shat bad jingpynkhreh ha kaba shat pylleng.) Hynrei, kumno-re-kumno, ha ka khyl-lipmat kaba u mut ban lynthaw noh artat ia ka pylleng, u sngew kumba ka pylleng kan shu btuit noh hi phloit na kti jong u. Bad ka la jia ryngkhat ha ka por kaba u dang pynphai ia ka pylleng sha kawei pat ka liang kaba shah ka phang jong ka, u la kum pyllait phiaw ha madan harud ka dieng-shat. U Nongkñia, ha ka jaka kaba un shim biang da kawei pat ka pylleng, u shu ieng sah hangta kum u biej, naba um ju shem koit kaba kum kata ka apod. Ha kata ka por, u la pyrkhat ba u la kum pyllait ia ka pylleng, lehse, na ka daw ba u kyllan da ka 'dew-saw kaba dang ktieh. Katba u dang pynshong nia bha ia kata ka jingjia, ka ktien u Sahep kaba ong, '*la pyndep*' ka la wan shoh biang hapoh ka jyngmut jong u. Kumta u la klet noh ia lade bad ia baroh kiba don ha syndah jong u. Um kynmaw shuh ia kita ki jyngkñia kiba don hangta bad ki jyngmut jyng-pyrkhat jong u ki la leit lut baroh sha kata ka jing-iakren jong u bad u Sahep ha lynti. Ki lok jong u kiba iadon hangta, ki shu ia-ap khmih lyngngoh ia u haba ki iohi ba uta u Nongkñia u shu ieng sah hangta. Kumba katto-katne por, u Nongkñia u la peit-mat pat. Ki lok jong u kiba iashong ha syndah jong u—sha kadiang bad sha kamon—haba ki iohi ia kata ka jingjia, ki la kylli ia u. U Nongkñia um imat sngewbha ei-ei ban ai kano-kano ka jubab ia ki. Ha kawei pat ka liang, u pynpaw ka jingsngewsih ban iakynduh kaba kum kata ka jingjia. Naba ym don lad shuh

da kumwei pat, u Nongkñia u la kyrpad ãa ki ba kin sngewbha ban shah biang ãa u ban pyn-leh na ka bynta u khun jong ki. Kiba haïng hasem jong uta u khynnah, wat la ki la sngew-artatien ãa u, kim banse ban shah ãa u namar u khun jong ki u la don ha tmier ka jingiap.

U Nongkñia u la pyrshang biang kumba mynshwa, bad hadien ba u la lynthaw ãa ka, ha khmih, ka pylleng kam shym pait satia. Nangta u shim ãa ka na khyndew, bad ha ka rukom kaba kham leh tohmet, u lympat biang sa shisien. Ha kane ka sien ruh ka pylleng kam shym pait. U Nongkñia u la sha-ïong ngaiñ bad um nang pyrkhath shuh da kumwei pat. Kiba haïng u nongpang ki la ma syrngiew naba kim ju shem koit kaba kum kata ka jingjia ha ka jingim jong ki.

Ki la sheptieng shi-katdei eh kat haduh ba ki pyrkhath ban ãaphet noh nangta. Shwa ba kin ãeng, uwei na ki, uba bat pyn-ap uwei u ãiar-ryngkuh uba tlem ha kti, u la ong ba ki dei ban sangeh, lehse, ka blei ka lah ban ai jubab ãa ki da kaba kñia da uta u syiar. U Nongkñia ruh u la ban ktien ba ka ju long ka rukom ba lada ym don jubab da ka pylleng ki dei ban kñia da u syiar ne da kino-kino kiwei pat ki mrad kiba sngaid bad ãa tlem bha.

Ha kajuha ka rukom, shwa ban khad ãa u syiar, u Nongkñia u kren u khana ha ka rukom kumba kylli, ba tohkit ãa ka daw ba ai jyngpang

jingshitom kumne:— “Ko rang ’iar-khad ko khun ka Blei, ba ioh ka hukum ka kular na myndang long ka pyrthei, shai ka pyrthei, na kjat ka Blei ban long u kit ryndang u shah ryndang mynba long ka niam ka rukom naduh u Hynñiew Trep, u Hynñiew Skum, Ah Kynrad, ba long ka pang ka shitom katne, nangno? ka daw ka lynti, kaba shoh kaba ther katne pleng, don hi ha phi ka Blei mo? ngan sa jied ia ka khmat ka long jot ka long rem ka jong phi ka Blei, la nga lait ha ka nguh ka dem, la nga lait ha u klong u skaw mo Blei Trai Kynrad, how da kiew da ka thoh da ka thung ha khmat u Blei, em me, nawei ka daw eh ka daw kher kaba shoh kaba ther, ieng rangbah u bynriew joit suk u Blei lyngngai, da weng ka thoh ka thung, ka kjap ka star mo?” (Na ka Kitab Niam-Kheĩn ki Khasi —Da u Rabon Singh). Mar shu dep kren ia-kyn-ud, u bat khak ia ka khlieh u syiar bad u ot pyndkut ar lyngkhot na ka ryndang jong u. U shim ia u syiar na ka kjat bad u pynthiah da khongpong ha kata ka rukom ba un jiar ia ka snam ha u lum ’dew saw ia uba u la pynkhreh khnang na ka bynta kata ka jyngkñia. (Hangne ruh ym lah ban pyni ia ka rukom pynkhreh ha kaba khad syiar). Ha kane ka sien ruh u Nongkñia u la khmih lynti ba la kumno kumno un ioh ka jubab na ka blei, phewse, u shem ba wat la u ryndang u la dkut ka snam pat kam jaw. Kata ka jingjia ka nang pynsheptieng shuh-shuh ia u. Kita kiba iadon ryngkat bad u, sha kadiang bad shakamon, ki la iaħer syrngiew lut. U Nongkñia u la king ka khlieh. Ha ka



jaka ba un pynshngaiñ ia ki da kano-kano ka lad, u la kren ruma kat shaba lap ha ka rukom kumba u iakren bad ka sna-ïap. Kita kiba iadon ryngkat bad u, haba ki iohi ba u la don ha kata ka jynlong, ki la nang sheptieng ar shah, Tang kumta hi ki la iaphet krad bad ieh noh dak ia u hangta marwei.

Kumba katto-katne por ynda u Nongkñia u la kham pher ka khlieh, u wad ia la ki lok bad u shem ba ki la iaphet lut baroh. U Nongkñia u la sngewkynjah bad um sngewlah ban shong slem ha kata ka jaka tang marwei hi.

Ha shwa ba un mih noh nangta, u sngew kumba dait ki khmat . U kyrjaw ia ki haduh ban da kem saw hoiñ. Bad haba u pyrshang peit, u sngew kumba byr-ïe. Kumno-re-kumno, haba u kum siat ki khmat ha uta u lum 'dew saw ong u, u iohi kumba don kawei pat ka snam kaba tuid hin-ly-hin halor hangta. Katba u dang khmih shaiñ ha i dieng iba u sieh halor uta u lum la wan ka jingkyngmaw sa shisien pat kaba ong, "*La pyndep*."

Ynda ka la jia biang kumta, u Nongkñia u la pisa ka hym bit shuh. U sngew kumba ka jingshai ka wan kynjat kyngsan ia ki khmat jong u ha ka por kaba u dang shu lah khie thiah. Sa shisien pat, u Nongkñia u la pyrkhat ha lade ba na ki jingpynleit jyngmut jong u sha kata ka jingiakren bad u sahep, lehse, ka shu wan paw hi ha u mynsngi kum ha ki jingphohsniew.

Hynrei ka jingphohsniew kaba kum kata 'u sngewthuh ba kam pynsuk ïa u lano-lano ruh lynda u ïoh kloï ka jingpynshai ïa ka jyngmut jong kata ka ktien. U tip ba dei tang u sahep hi uba lah ban leh ïa kata. Na kata ka daw, u la kwah eh ban ïakynduh biang bad u sahep. Hynrei haba 'u la pynshongnia bha ha lade, u sngew ba u la pynhiar dor ïa la ka longrynieng khamtam kum ma u uba ki briew baroh ki la shaniah lut. Kumta u la kut jyngmut ban leit noh dang shai sha la ïing khnang ba un lait ïakynduh bad u sahep ha lynti.

Te ynda la janmiet ha ka por ba u Nongkñia u leit phai noh sha la ïing, ha khmih, ha kajuh ka lynti. u ïashem biang bad u Sahep. U Sahep, da ka khmat kaba puh samrkhie, u la kren ïa u. U Nongkñia um kren wat shi kyntien ruh--- u la long kumba shoh tyndep. U Sahep u la iphylla bad u la pyrkhat ba. lehse, uta u Nongkñia um shait bha. Kumta u la ïai ban ktien, bad khatduh eh, u Nongkñia u phla bæ ka jyngmut jyngpyrkhat jong u kam shai shuh namar ba la kah dum noh da ka syrngiew jong ka ktien *la pyndep*. U Sahep naba u pyrkhat da kumwei pat, u la sngewlyngngoh ban ïohsngew ïa kata ka ktien ba ka mih na ka shyntur u Nongkñia. U la sngewthuh ba don ei-ei hadien kata. Namar kata, u Sahep u la ïathuh bad u batai thik kumba la thoh ha ka Kotbah. U ong, ïa ka ktien *la pyndep*, lah ban shem na ka Kospel u Ioannis XIX : 30 jong kane ka Kitab Bakhuid (ka Baible kaba u bat ha kti.)

U Nongkñia u la ban ktien biang, kumno lah ban long ba ha Ri Khasi kim ju bna ïa uta U Jisu hynrei ki lah pat biang-biang ban pynshait ïa u nongpang tang da ka shat ka kheĩñ bad ka kñia ka khriam. U Sahep u la jubab ba kam long kaba shisha ba lyngba ki jyngkñia u briew u lah ban koit pat. U Blei u la ai ha ki ka sap ba kin tip ba kumno yn sumar ïa lade ha ka por ba pang. La ong ba U Blei hi u iarap tang ïa kito ki briew kiba iarap ïa lade. U Trai u ong ba wat kiba ong Ah Trai, Ah Trai kim ïoh lait im hapoh ka hima ki bneng: hynrei tang uta keiñ uba leh ïa ka mon U Kpa uba ha bneng. U Sahep u ong de ba u wan sha Ri Khasi ym ban iapyni bor badno-badno ha kaba pynkoit ïa u nongpang hynrei ban wallam ka jingshai ïa Uta keiñ uba la pyn-im ei ïa ngi na ki pop jong ngi. Une u long U Khun U Blei bad da u ngi lah ban wan sha U Blei.....*Nga uba long kata ka lynti, bad ka jingshisha, bad ka jingim de: ym don uba wan ha U Kpa, hynrei tang da Nga.* (Ioannis XIV : 6).

**Nongkñia**      Balei U Jisu Khrist um wan hi da lade sha Ri Khasi ban pyn-im ïa ka Ri Khasi jong ngi.?

**Sahep**            U Jisu u wan sha pyrthei ban shim ïa ka jynlong briew. U im kum u briew, bad u ïaid lyngba bun tylli ki jaka katba u lah, ban leh shibun ki kam kum u briew bad kum U Blei. Nalor kata, u pyn-

long synran ïa ki briew na ka bynta ban ïalap ïa ka kyrteng jong u uba long shi tylli bad U Kpa uba ha bneng. U don 12 ngut ki synran kiba im ryngkat bad u katba u dang don ha kane ka pyrthei. Kita ki 12 ngut ki synran jong u ki long kine.—*Uba nyngkong, u Simon, ïa uba la khot U Petros, bad U Andriw u para jong u; U Jakob u khun U Sebedi, bad U Ioannis u para jong u; U Philip, bad U Bartholomai; U Thomas, bad U Mathaios u nongkhrong; U Jakob u khun U Alphaïos, bad U Lebbaïos, ïa uba ki sin Thaddaios, U Simon u Bashitrhem, bad U Judas Iskariot, uba la die noh ïa u ruh.* (Math. X:2-4). Bad dei ma ki kiba la wallam ïa ka Jingshai—ka Jingshai ka jong U Khrist hi, sha kane ka pyrthei haduh kine ki sngi mynta. Ka ktien ka ong, *jar uba ngeit ha u un ïoh ka jing-pyn-im ei.*

### Nongkñia

Ho-oid sahep, ka dei kaba phi ong. Ka jingngeit shisha ka long ka nongrim katba ka jingleh pat ka long ka ïing-shong ïa ka jingim jong ngi u briew. Ki Khasi jong ngi ki long ki briew kiba ngeit Blei. Ban pynshisha ïa kata, ki pyrshang

ban leh ïa kaei-kaei kaba U Blei u la hikai ïa ki. Haduh kine ki sngi, ki Khasi kim ju ieh noh ïa ka kñia ka khriam, bad kata hi ka pyni ba ki leh ïa kaei kaba ki ngeit. Toi lada ym don jingngeit yn nym don jyngkñia ei-ei ruh em ha Ri Khasi jong ngi. Phi ïathuh ba U Jisu u don 12 ngut ki synran kiba u la jied khnang na ka bynta ban wallam ïa ka jingshai U Khrist sha kane ka pyrthei. Te, ha kajuh ka dur, ngan ïathuh ha phi ba u Syiem Nongkrem jong ngi ruh u don 12 ngut ki nongkñia, bad kita ki long—*U Dieng-ïei, U Morshan, U Naram Shillong, Ka Phan Syiar Shillong, U Biskorom, U Blei Shillong, Ka Blei Long Syiem, U Phan Kynthei, U Phan Shynrang, Ka Lei Duwan, Ka Syiem Sngi, Ka Blei Synshar.* Kine pat ki ai ha ngi ka jingshai lyngba ka dak ka shin kaba paw ha ki jyngkñia. Ym tang katta, ha ka miet kaba khatduh jong ka Pomblang, ynda la dep ki jingleh niam baroh kiba dei ha u Thawlang, ka lawbei, bad u Suidnia jong ki syiem bad ha u Phan u Kyrpad jong ki syiem, bad jong ki Bakhraw, u Syiem u pynlong ka Dorbar Sla, ne ka Dorbar Blei. Ha kane ka Dorbar,

ym don jyngkñia shuh, ne jingsuit jingshor ei-ei; hynrei don sa tang ki jingduwai bad jingkyrpad ha U Blei U Trai Kynrad. Ki sdang ïa kane ka dorbar da kaba ïabam ïa ka dohkñia jong ki 'langsla bad u niang-Suidnia Longsyiem—lai sien lai wat. Ynda ki la lah ïabam doh, ki ïadih sa ka ïad-um.....bad nangta, ki ïaduwai ha la ka jong ka jong ka mynsiem.....(Na ka Niam Khasi—Da u H. Lyngdoh).

(U la ïathuh te, to khie leit shapoh kata ka nongbah sha uta u briew bad ong ha u, U Nonghikai u ong. Ka por jong u ka la jan; ngan rakhe ïa ka niam ka jinglait ha ïing jong me, lem bad ki synran jong nga.....bad ki la ïakhreh ïa kata ka niam ka jinglait. Haba la janmiet te, u la ïashong bam bad kita ki khatar ngut (Math. XXVI:18-20). Te haba ki dang ïabam, U Jisu u la shim ïa u Kpu, bad ynda u la nguh, u la kdiah: bad u la ai ha ki synran, u la ong, To shim, to bam, une u long ka met jong nga. Ynda u la shim ïa ka Khuri ruh, bad u la nguh, u la ai ha ki, u da ong, To dih na kane phi baroh; naba kane ka long ka snam jong nga, kaba ka jong ka jutang bathymmai, ïa kaba yn sa pynmih noh na ka bynta kiba bun, ïa ka ban map ïa ki pop. (Math. XXVI:26-28).

Kumba katto-katne por hadien ba ki la ïakren, ki ïapra noh sha la ki jong ki jong ki lynti ïing jong ki.

Ka por ka la miet, bad u Nongkñia u tang shu poi ha iing u ong ia la ki khun ban pynkhreh bam noh ia u. Haden kata u dih дума, u bam kwai, bad khatduh eh, u leit thiah noh. Mar shu buh ka khlich ha jyingthiah, u la ioh thiah suk. Ym slem hadien kata, imat namar kano-kano ka daw, u la kyndit thret. Ha ka sien kaba ar, shwa ba un leit khmat, kumno-re-kumno u ioh-sngew ba don kiba iakren ha kawei pat ka jyingthiah, bad kumta na ka jingiakren jong ki ka la pynkynmaw biang ia u sha kata ka por kaba u iakren bad u sahep. Haba u sngap bha ia kata ka jingiakren, u iohsngew pynban ia ka sur u Sahep kaba u iakren ha lynti kaba ong kumne, *Naba U Blei u la iei katta-katta ia ka pyrthei, katba u la aiti noh ia la u Khun ba la kha marwei, ha uei-uei ruh uba ngeit ha u, un ym jot shuh, hynrei un ioh ka jingin hymjukut.* Te katba u dang pynshah shkor ia ka jingud kata ka ktien, kynsan-kynsan, la kyn-ih u syiar nyngkong, "ih-ih-ih—oh." U Nongkñia u pyrkhat ba ka por ka la dei ba un khie noh. Ha jyingthiah, ha ka por katba u dang thiah-peit marwei, u sngew-lung ka mynsiem ban iohsngew ia ka sur ba jai-jai bad ba jem jong kata ka jingkhoh iei. Suki-suki, ka jingdum ka tap biang ngaiñ ia ki khmat jong u. Sa shisien pat. u ngam biang jar sha ki jingphohsniew. Ha kata ka jingphohsniew, u Nongkñia u shem ia lade ba u don ha kawei pat ka pyrthei—ka pyrthei jong ka jingiohi paw. Ha lynti, kum ha ka por ba u iakynduh bad u Sahep, u iakynduh ia uwei pat u bried uba ialap shaphang U Khrist Nongpyn-im. U Nongkñia, namar kata,

um kwah shuh ban iakren ei-ei bad u namar u la tip na u Sahep shaphang U Jisu Khrist. Ha ka jaka kaba un sngap ia ka jingialap uta uwei pat u lok, da lade hi u pynpaw ia kiei-kiei baroh kiba la iathuh ha u da u Sahep, bad ia ki jingjia baroh kiba u iashem markhmat hadien ba u la iakynkduh bad u Sahep. Tang shu iohsngew ia kata, uta u briew u la kylli ia u Nongkñia: *Phi phi ong ba U khrist u long Uei?* (Math. XVI:15) U Nongkñia u la jubab: *U long U Khrist U Khun U Blei Ba-im.* (Math. XVI:16). Uta u briew u iathuh ha u Nongkñia ia ka ktien kaba U Jisu u kren: *Lada phi la ithuh ia nga, phin da ithuh ia U Kpa jong nga ruh: hynrei naduh mynta phi la ithuh ia u, bad phi iohi ia u.* (Ioannis XIV:7).

Katba u briew u dang iathuh ia kane ka ktien, ha khmih, u Nongkñia u dem ngun la ka khlieh sha khyndew. Bad hapdeng ka jingdap ka mynsiem da ka jingkūh bad jingsheptieng ia la ki pop, u la kylli kumne: *Aiu ka dei ia nga ban leh ba yn pyn-im ia nga.....* U te u la iathuh : *To men ngeit ha U Jisu Uba U Trai bad yn sa pyn-im ia me.* (Ki Kam. 16:30-31). Namar kata, to kylla kaba mut, to wan phai khmat ruh, ban ioh pyndam noh ia ki pop jong phi. (Ki Kam. 3:19). Namar ka jingai-ei la pyn-im ia phi, da ka jingngeit keiñ; kata ruh ym na phi hi; ka long ka jingai U Blei. (Ephesos 2:8). Dei ha kata hi ka por, u Nongkñia u la pdiang ia U Jisu Khrist bad u phla kumne: *U Khrist U long U Blei jong nga.; ngan mane dem ia u; ka jingim bad ka bynta jong nga ki long ka jong u; to isyn-ei ia nga bad*



*to pdiang ruh ia u nongpop kum ma nga. Uta u briew u la iathuh ba U Trai u ong, Ym u briew baroh uba ong ha nga, Ah Trai, Ah Trai, u ban ioh leit hapoh ka hima ki bneng; hynrei uta keiñ uba leh ia ka mon U Kpa jong nga uba ha bneng (Math. VII:21-21). U Nongkñia u la kylli biang kaei ba u dei ban leh ban ioh pyndep ia ka mon U Kpa uba ha bneng. Uta u briew u la ong: To sumar ia ka hukum U Blei U Kpa uba ha bneng bad to kohnguh ruh ia ka hukum U Khrist kaba ong: Namar kata keiñ to khie da leit noh ma phi, to pynlong synran ia ki hynriew baroh, da pynbaptis ia ki ha ka kyrteng ka jong U Kpa, had ka jong U Khun, bad ka jong U Mynsiem Bakhuid, da hikai ia ki ban sumar ia kiei-kiei baroh kat kiba nga la hukum ia phi. Ha khmih. ruh nga nga long ryngkat bad phi ha la ka sngi, haduh kaba wai noh ka pyrthei. (XXVIII:18-19)*

Mar iakut kita ki ktien, u Nongkñia u la kyndit thret naba thiah. Nangta u peit shane bad shawei ha kamra thiah jong u, bad katba u dang khmih-iit bha u iohi pynban na i thliw pongshai ba ka bneng ka la kynjat jingshai. Hangta u khie joit naba thiah bad u sdang ka sliew ding. Ha kajuh ka rukom, katba u dang pynleit jyngmut shaphang ki jingphohsniew jong u, u iohsngew ba la kyn-ih u syiar laisien. Ka pyrthei ka la shai kdar, ki khun ki kti bad kiba haiing hasem jong u ki la iakhie thiah lut baroh. U Nongkñia u la kwah eh ban ioh phla ha kiba haiing jong u ia ka jingshem mynsiem bad jingjia baroh phar kaba u iakynduh

mar khmat ha ka jingim jong u. Khlem leh-raiñ, ha ka por ba ki dang iabam ja khruai baroh shi thynriew-iing, u phla lut khoit ia kaei kaba u iakynduh ha la ka jingim ryngkat bad ka jingkut jyngmut jong u ban bud ia U Trai Jisu Nong-pyn-im. Kiba haing jong u, nyngkong, ki la sngewsammut ba kum ma u uba borabor tang ka iapyrshah. Khristan u pynpaw kum kata ka ktien. Bad hadien hadien haba ki iohi ba u la kren shisha naduh la ka dohnud, ki la sdang ban iakyan bad khang pyrshah ia u da kaba ong ba kim mon ba un long Khristan. Te ka la mih ka jingiakren laiphewjait haduh ban da win ka iing jlang. Ha ka por ba dang iakhynwin bha ki jingiakren, iwei i khyllung iba dang thiah, i la kyndit thret, i khie joit naba thiah, i mareh sha iing-shetja, bad ha ka por ba ki dang iabun bha khruai, i la iathuh ba i phohsniew kawei ka jingphohsniew kaba phylla bha kaba iadei bad u kpa jong ki. Baroh kiba iadon hangta, ki iasngap jar tang shu iohsngew ia ka jingphylla na ita i hep kynthei khatduh jong ki. Ita i khyllung i iathuh ba i phohsniew ba u kpa jong ki u riam da ka jaiñ kaba lieh baroh shi ryn-ieng, bad halor tyrpeng jong u shong ar tylli ki paro lieh kiba rah khubor ha kjat jong ki. I ong de, u kpa jong ki u shim ia kila ki khubor na kjat ki paro, u pule ia ki bad um shyu iathuh hano-hano ruh ia kaei kaba thoh ha ki. Baroh kiba don hangta, ki la sngew phylla shi-katdei eh bad kim nud shuh ban pynphai ktien da kumwei pat. U kpa jong ki, ha kawei pat ka liang, um kren shuh shi kyntien ruh. U shim ia ita i khyllung

bad u thum khop ia i. Kiba haïing jong u, mar shu dep bam, ki iapra sha la ka jong ka jong ka jingtrei bad ka jingiakren ka la wai noh artat ha kata ka por.

Te ka la jia ha ka por shiteng sngi haba la kynjah briew ha shnong, u Nongkñia u la mih weibriew na la iing ban leit wad biang ia uta u nongpang. U tang shu poi ha iing u nongpang, u la lyngngoh ban shem ba u la kham bit. Kiba haïing u nongpang, ha kawei pat ka liang, ki la pdiang sngewbha ia u Nongkñia ha iing jong ki. Hadien kata, ki la iathuh ha u ba ka long kaei-kaei kaba phylla ba u nongpang u la kham ioh bor.

U Nongkñia u la sngewthuh ia kaei kaba la jia-long, bad kumta u la iakmen lem bad ki na ka bynta u nongpang. Ha shwa ba un leit noh, u Nongkñia u la shim ia u nongpang na kawei ka kti bad hangta u la kyrkhu kyrdoh ba un nangshait irat.

Haba u Nongkñia u shem ba kiei-kiei baroh kiba la jia-long ki long ka dak ba pyni ia ka jingsuk, u sngew ia lade ba u long u jynghaw bathymmai. Um long shuh kum kita kiwei pat ki briew ki bym don ka jingkyrmen. 'Ka jingsuk ka la synshar halor jong u. U la ioh ia kata ka jingsuk kaba ong, *'Ia ka jingsuk nga iehnoh ha phi, ia ka jingsuk jong nga nga ai ha phi, ym kumba ka pyrthei ka ai, nga ai ma nga ha phi, wat khih khuslui lymne wat sheptieng.*

(Ioannis XIV:27). Kum u jynghaw bathymmai, u Nongkñia u la klet noh ïa ki jingsheptieng baroh, bad halor kata, u la kut jynghmut ban leit ïasuk bad u Sahep bad ban ïasyllok bad u ha ïing jong u.

**Sahep** Oh, i Bah, phi wan shaei kumne, la katta por?

**Nongkñia** Sahep, nga kwah ban ïakynduh bad phi mynta ha kane ka por.

**Sahep** Nga sngewkmen shibun ban ïohi ïa ki lok ba ki wan kai ha ïing jong nga. Toi naduh kato ka por kaba nga ïakynduh bad phi ha lynti nga la kwah eh ban ïashong kai hynrei ngam ïoh lad satia ban leh kumta namar nga tip ba phi bun kam.

**Nongkñia** Ho-oid. Sahep, nga bun kam shisha bad ngam ju ïoh por hi ruh ban ïashong kai bad ki lok jong nga.

**Sahep** Oh, shisha, hynne mynstep nga ïa-kynduh bad i kyn-um jong phi (u kñii rangbah duh ha kata ka ïing-khun u Nongkñia) ha lynti bad i rah uwei u iar-ryngkuh ha kti. Haba nga kylli ïa i shano in leit, i ïathuh pynban ba phi la ïoh ksuid bad kumta in leit ai khein ksuid na ka bynta jong phi.

**Nongkñia** Ka ju long kumta, Sahep, ha ka dustur Khasi, haba u briew u ïoh ksuid, ym kumba nga long, hynrei kumba kiwei ki long.

**Sahep** Phi mut aiu da kaba ong kumta?

**Nongkñia** Sahep, nga la ïakynduh bad phi ha lynti bad hadien kato ka sngi kiei-kiei baroh kiba ngi la ïakren ki la wan paw sa wan paw hi hapoh ki jyngpyrkhat jong nga la nga don ha kano-kano ka jaka.

Kine ki jingjia, ki la pyndap ïa ka mynsiem jong nga da ki jingklusai. La katta snem nga la im ha kane ka pyrthei ngam ju shem koit ka jingjia baphylla kaba ktah ïa ki jyngmut jyngpyrkhat jong nga. Hapoh ki jyngpyrkhat jong nga la pyndap sa tang da kito ki ktien ïa kiba nga la ïakren bad phi. Borabor, haba nga ïakren badno-badno, nga pyrshang ban law ïa kano-kano ka jingïakren kaba woh bad thaiñ ha kata ka rukom ba kan nym wan shuh sa shisien pat hapoh ki jyngpyrkhat jong nga. Bun bun ki nonghikai niam ki la pyrshang lehnoh-ei ban khring ïa nga sha kata ka jinghikai ba bakla jong ki. Nga sngewthuh shai ba bun na ki ki mane ïa ki blei thala. Ka jinghikai jong ki ka long ka bym don nongrim bad bym shisha. Hapdeng ki jinghikai ba bun jait, nga la ju pyrkhat ba dei tang ka niam Khasi hi, lehse, kaba mane shisha ïa U Blei Ba-im. Phewse, ka por ka jia hadien ba nga la ïashem bad

phi nga sngewthuh ba dang don hi sa kawei pat ka niam kaba ngeit shisha ia U Blei Ba-im. Namar haba nga sngap bad pynshongnia ia ka jingĩathuh jong phi nga shem bun kiei-kiei kiba phi la kren ki long kiba don nongrim bad shisha. Kane hi ka la long kumba siat ei-ei hapoh ka mat-ĩong jong nga bad ngam lah khlem khapbrip. Nalor kata, haba nga shim ban pynshongnia da ka nongrim kaba ngi ngeit ka don ka jingĩasyriem kaba iajan eh bad ka jingngeit jong phi. Toi, ha ka jingshisha, ngim shym la tip shaphang Uta U Jisu Khrist, hynrei ia kaei kaba u kren, kat kum ka jingĩathuh jong phi, ngi la don lypa ha ka jingngeit jong ngi. (Ha sngap na Krem Lamet Latang, U Rangiarkhad, u Khraw Jutang: 'Haduh ba poi ka sngi Uta, Kam pher,' u ong, 'Ngan kit ma nga: Te me, u briew, men lait shitom Ha khmat U Trai Nongthaw junom.' (Ki Sngi Ba Rim U Hynniew Trep—U Simpyllieng, XIII—U S. Tham) Wat la ngim lah ban tip ia kaei kaba u la hikai ia ki synran jong u, phewse, ia ka syrngiew jong kata ka jinghikai ngi la lah bud naduh mynshwa. Ia kawei-pa-kawei ka bynta kaba phi la iathuh nga la pyrshang ban ianujor bad nga shem ba kiei-kiei baroh ki long kumjuh. Lada ym don ka jingshisha ha ka jingĩathuh jong phi, ki jingkhuislai kin nym lah ban ioh jaka hapoh ka mynsiem jong nga. Borabor, nga wad tang ia kaei kaba shisha. Bad lada kata ka jingshisha ka wan hapoh jong nga ngam lah ban kynran noh na ka. Ha ka jingshisha, ym don kaei-kaei kaba pher hapoh ka jingim jong nga, hynrei namar ka jing-

shisha ka jingīathuh jong phi ka la pynpyrkhat  
 ia nga kat haduh ba nga shem ia lade u  
 briew uba shong ha kawei pat ka pyrthei. Kiei-  
 kiei baroh kiba nga la pyrshang ban leh na ka  
 bynta u nongpang kat kum ka jingngeit Khasi,  
 ki la shu long lehnoh-ei. Ka daw tynrai ka long  
 namar nga la pynleit lut ia ki jynghmut jynghpyr-  
 khat jong nga sha kawei pat ka bynta jong ka  
 jingngeit.

Ha ki sngi shwa ba ngan iakynduh bad phi  
 nga sngewthuh ha lade ba da kata ka jingngeit  
 kaba nga don ka ai bor ia nga ban leh ei-ei na  
 ka bynta kita ki briew kiba don ha kajuh ka jing-  
 ngeit. Ki jynghmut jynghpyrkhat jong nga ruh ki  
 ju iaid beit bad ryntih. Naduh dang khynnah  
 i mei-rad pa-rad i la hikai ia nga ban ngeit bad  
 mane tang ha U Blei Ba-im bad ban bud ha ka  
 lynti iaid jong u. Ki hikai de ia nga ha kano  
 ka rukom ngan pynsngewbha ia U Blei da ki  
 jingai-nguh thang jong nga. Halor kane ka jing-  
 shisha, nga ju pyrkhat ba dei tang kane hi ka  
 lynti kaba lah ban pyn-im ia nga bad ia ka jait-  
 bynriew Khasi. Mynta pat, haba nga iohsngew  
 ia kane ka jinghikai jong phi, nga sngew kumba  
 la pynpeit ia ki khmat jong nga ba kumno ngan  
 tip ban iaid ha kata ka lynti kaba nga lah ban  
 iakynduh bad U Blei. Kane ka jinghikai kaba  
 phi la wan rah sha kane ka Ri Khasi jong ngi  
 kam long satia ka jingpynkylla thymmai ia ka  
 jingngeit kaba ngi don, hynrei ka pynskhem  
 ia ka ha ka dur bad rukom kaba thymmai.  
*Wat mut ba nga la wan ia ka ban pyndam noh ia*

*ka hukum lane ia ki nongiathuhlypa ; ngam shym la wan ia ka ban pyndam noh, hynrei ia ka ban pynskhem. (Math 5 : 17) Namar kata, nga don ka daw kaba khraw ban pdiang ia U Jisu Khrist kum u Nongpyn-im jong nga, bad mynta nga ngeit ba ym dei shuh u syiar hynrei dei tang ma u hi uba la siewspah ia ki pop jong ngi baroh da kaba u shah iap ia lade halor ka dieng-phna. To ai ba kane ka jinghikai kan ioh jaka ha dohnud jong kita ki ar ngut ki nongpang, bad nga kyrmen ruh ba kan iaaid shaphrang ha kane ka Ri jong ngi khnang ba ka jaitbynriew Khasi kan ioh ia ka jingpyn-im ei da U Jisu Khrist.*

### Sahep

Long ba la kyrkhu ia ka kyrteng jong phi. Ha kane ka sngi la pyn-im ia phi ha ka kyrteng ka jong U Jisu Khrist. To ngin leh bad bud ia ka hukum U Trai Jisu kaba ong, *Namar kata, keiñ to khie da leit noh ma phi, to pyn-long synran ia ki bynriew baroh, da pynbaptis ia ki ha ka kyrteng ka jong U Kpa, bad ka jong U Khun, bad ka jong U Mynsiem Bakhuid, da hikai ia ki ban sumar ia kiei-kiei baroh kat kiba nga la hukum ia phi. Ha khmih ruh nga nga long ryngkat bad phi ha la ka sngi, haduh kaba wai noh ka pyrthei. XXVIII:18-19.)*





**Lah ban loh**

**Ki Biria u 'Peh-Sylli**

Bynta I	...	...	60P.
---------	-----	-----	------

,, II	...	...	Rs. 1.50P.
-------	-----	-----	------------

Ki Nuksa ha ka jingim ba dei ban phikir	...	..	...	Rs. 2.00
--------------------------------------------	-----	----	-----	----------

Ka Dienshonhi	...	...	Rs. 12.00
---------------	-----	-----	-----------

**Na kine ki Dukan.—**

Shillong Co-operative Marketing Society Ltd.  
Barabazar, Shillong—2.

Chapala Book Stall, Shillong.

**La Shon ha Ri Khasi Press, Shillong—1.**